

T 2511

8243

前漢後魏

漢

儒林傳一

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

廿八之五

儒林傳第一

通志一百七十二

前漢

丁寬

施讎

孟喜

梁丘賀

京房

費直

高相

伏生

歐陽生

林尊

夏侯勝

周堪

張山拊

孔安國

申公

王式

轅固生

后蒼

韓嬰

趙子

毛公



魯徐生

孫延襄

孟卿

胡毋生

嚴彭祖

顏安樂

瑕丘江公

房鳳

後漢

劉昆

洼丹

雒陽鳴

任安

楊政

張興

戴憑

孫期

歐陽歙

牟長

宋登

張馴

尹敏

周防

孔僖

子李彦

楊倫

高翹

包咸

魏應

伏恭

任末

景鸞

薛漢

杜撫

召馴

楊仁

趙暉

衛宏

董鈞

丁恭

周澤

鍾興

甄宇

樓望

程曾

張玄

李育

何休

服虔

穎容

謝該

許慎

蔡玄

魏

董遇

賈洪

薛夏

魏禧

樂詳

前漢

太史公曰余讀功令至於廣厲學官之路未嘗不廢書而嘆也曰嗟乎夫周室衰而關雎作幽厲微而禮樂壞諸侯恣行政由彊國故孔子閔王路廢而邪道興於是論次詩書修起禮樂適齊聞韶三月不知肉味自衛反魯然後樂正雅頌各得其所世以混濁莫能用是以仲尼干七十餘君無所遇曰苟有用我者期月而已矣西狩獲麟曰吾道窮矣故因史記作春秋以當王法其辭微而指博後世學者多錄焉自孔子卒後七十子之徒

散游諸侯大者爲師傅卿相小者友教士大夫或隱而
不見故子路居衛子張居陳澹臺子羽居楚子夏居西
河子貢終於齊如田子方段干木吳起禽滑釐之屬皆
受業於子夏之倫爲王者師是時獨魏文侯好學凌遲
以至於始皇天下並爭於戰國儒術旣絀焉然齊魯之
間學者獨不廢也至於威宣之際孟子荀卿之列咸導
夫子之業而潤色之以學顯於當世及至秦之季世焚
詩書坑術士六藝從此缺焉陳涉之王也而魯諸儒持
孔氏之禮器往歸陳王於是孔甲爲陳涉博士卒與涉

俱死陳涉起匹夫驅瓦合適戍旬月以王楚不滿半歲
竟滅亡其事至微淺然而縉紳先生之徒負孔子禮器
往委質爲臣者何也以秦焚其業積怨而發憤于陳王
也及高皇帝誅項籍舉兵圍魯魯中諸儒尚講誦習禮
樂絃歌之音不絕豈非聖人之遺化好禮樂之國哉故
孔子在陳曰歸與歸與吾黨之小子狂簡斐然成章不
知所以裁之夫齊魯之間於文學自古以來其天性也
故漢興然後諸儒始得脩其經藝講習大射鄉飲之禮
叔孫通作漢禮儀因爲大常諸生弟子共定者咸爲選

首於是喟然嘆興於學然尚有干戈平定四海亦未暇
遑庠序之事也孝惠呂后時公卿皆武力有功之臣孝
文時頗徵用然孝文帝本好刑名之言及至孝景不任
儒者而竇太后又好黃老之術故諸博士具官待問未
有進者及武帝即位趙綰王臧之屬明儒學而上亦鄉
之於是招方正賢良文學之士自是之後言詩於魯則
申培公於齊則轅固生於燕則韓太傅言尚書自濟南
伏生言禮自魯高堂生言易自菑川田生言春秋於齊
魯國胡毋生於趙自董仲舒及竇太后崩武安侯田蚡

爲丞相繼黃老刑名百家之言延文學儒者數百人而
公孫弘以春秋白衣爲天子三封以平津侯公天下之
學士靡然鄉風矣公孫弘爲學官悼道之鬱滯乃請曰
丞相御史言制曰蓋聞導民以禮風之以樂婚姻者居
室之大倫也今禮廢樂崩朕甚愍焉故詳延天下方正
博聞之士咸登諸朝其令禮官勸學講議洽聞舉遺興
禮以爲天下先太常議與博士弟子崇鄉里之化以廣
賢才焉謹與太常臧博士平等議曰聞三代之道鄉里
有教夏曰校殷曰庠周曰序其勸善也顯之朝廷其懲

惡也加之刑罰故教化之行也建首善自京師始由內
及外今陛下昭至德開大明配天地本人倫勸學脩禮
崇化厲賢以風四方太平之原也古者政教未洽不備
其禮請因舊官而興焉為博士官置弟子五十人復其
身太常擇民年十八已上儀狀端正者補博士弟子郡
國縣道邑有好文學敬長上肅政教順鄉里出入不悖
所聞者令相長丞上屬所二千石二千石謹察可者當
與計偕詣太常補受業如弟子一歲皆輒試能通一藝
以上補文學掌故缺其高第可以為郎中者太常籍奏

即有秀才異等輒以名聞其不事學若下材及不能通
一藝輒罷之而請諸不稱者罰臣謹按詔書律令下者
明天人分際通古今之義文義爾雅訓辭深厚恩施甚
美小吏淺聞不能究宣無以明布諭下治禮次治掌故
以文學禮義為官遷留滯請選擇其秩比二百石以上
及吏百石通一藝以上補左右內史大行卒史比百石
以下補郡太守卒史皆各二人邊郡一人先用誦多者
若不足乃擇掌故補中二千石屬文學掌故補郡屬備
負請著功令佗如律令制曰可自此以來則公卿大夫

士吏斌斌多文學之士矣班固曰昭帝時舉賢良文學
增博士弟子員滿百人宣帝末增倍之元帝好儒能通
一經者皆復數年以用度不足更爲設員千人郡國置
五經百石卒史成帝末或言孔子布衣養徒三千人今
天子太學弟子少於是增弟子員三千人歲餘復如故
平帝時王莽秉政增元士之子得受業如弟子勿以爲
負歲課甲科四十人爲郎中乙科二十人爲太子舍人
丙科四十人補文學掌文云自魯商瞿子木受易孔子
以授魯橋庇子庸子庸授江東馯臂子弓子弓授燕周

醜子家子家授東武孫虞子乘子乘授齊田何子裝及
秦禁學易爲筮卜之書獨不禁故傳受者不絕也漢興
田何以齊田徙杜陵號杜田生受東武王同子仲雒陽
周王孫丁寬齊服生皆著易傳數篇同授淄川楊何字
叔元元光中徵爲太子中大夫齊即墨成至城陽相廣
川孟但爲太子門大夫魯周霸莒衡胡臨淄主父偃皆
以易至大官要言易者本之田何
丁寬守子襄梁人也初梁項生從田何受易時寬爲項
生從者讀易精緻過於項生遂事何學成何謝寬寬東

歸何謂門人曰易以東矣寬至雒陽復從周王孫受古
義號周氏傳景帝時寬為梁孝王將軍拒吳楚號丁將
軍作易說三萬言訓故舉大義而已今小章句是也寬
受同郡碭田王孫王孫受施讎孟喜梁丘賀繇是易有
施孟梁丘之學

施讎字長卿沛人也沛與碭相近讎為童子從田王孫
受易後讎徙長陵田王孫為博士復從卒業與孟喜梁
丘賀竝為門人謙讓常稱學廢不教授及梁丘賀為少府
事多廼遣子臨分將門人張禹等從讎問讎自匿不肯

見賀固請不得已乃授臨等於是賀薦讎結髮事師數
十年賀不能及詔拜讎為博士甘露中與五經諸儒雜
論同異於石渠閣讎授張禹琅邪魯伯伯為會稽太守
禹至丞相禹授淮陽彭宣沛戴崇子平崇為九卿宣大
司空禹宣皆有傳魯伯授太山毛莫如少路
姓毛名莫如字少路
琅邪邴丹曼容著清名莫如至恒山太守此其知名者
也繇是施家有張彭之學

孟喜字長卿東海蘭陵人也父號孟卿善為禮春秋授
后蒼疏廣世所傳后氏禮疏氏春秋皆出孟卿孟卿以

禮經多春秋煩雜乃使喜從田王孫受易喜好自稱譽
得易家候陰陽災變書詐言師田生且死時枕喜鄰獨傳
喜諸儒以此耀之同門梁丘賀䟽通證明之曰田生絕
於施讎手中時喜歸東海安得此事又蜀人趙賓好小
數書後爲易飾易文以爲箕子明夷陰陽氣亡箕子箕
子者萬物方荻茲也賓持論巧慧易家不能難皆曰非
古法也云受孟喜喜爲名之後賓死莫不持其說喜因
不肯仞以此不見信喜舉孝廉爲郎曲臺署長病免爲
丞相掾博士缺衆人薦喜上聞喜改師法遂不用喜喜

受同郡白光少子沛翟牧子兄皆爲博士繇是有翟孟
白之學

梁丘賀字長翁琅邪諸人也以能心計爲武騎從太中
大夫京房受易房者淄川楊何弟子也房出爲齊郡太
守賀更事田王孫宣帝時聞京房爲易明求其門人得
賀賀時爲都司空令坐事論免爲庶人待詔黃門數入
說教侍中以召賀賀入說上善之以賀爲郎會八月飲
酎行祠孝昭廟先歐旄頭劍挺墮墜首垂甬泥中刃鄉
乘輿車馬驚於是召賀筮之曰有兵謀不吉上還使有

司侍祠是時霍氏外孫代郡太守任宣坐謀反誅宣子
章爲公車丞亡在渭城界中夜玄服入廟居郎間執戟
立廟門待上至欲爲逆發覺伏誅故事上常夜入廟其
後待明而入自此始也賀以筮有應繇是近幸爲太中
大夫給事中至少府爲人小心周密上信重之年老卒
官傳子臨亦入說爲黃門郎甘露中奉使問諸儒於石
渠臨學精熟專行京房法琅邪王吉通五經聞臨說善
之時宣帝選高材郎十人從臨講吉乃使其子郎中駿
上疏從臨受易臨授五鹿充宗君孟爲少府駿御史大
夫自有傳充宗授平陵士孫張仲方沛郡彭祖子夏齊
衡咸長賓張爲博士至揚州牧光祿大夫給事中家世
傳業彭祖真定太傅咸王莽講學大夫繇是梁丘有士
孫鄧衡之學

京房受易梁人焦延壽延壽云嘗從孟喜問易會喜死
房以爲延壽易即孟氏學翟牧白生不肯皆曰非也至
成帝時劉向校書考易說以爲諸易家說皆祖田何楊
叔丁將軍大誼畧同唯京氏爲異黨延壽獨得隱士之
說託之孟氏不相與同房以明災異得幸爲石顯所譖

誅自有傳房授東海殷嘉河東姚平河南乘弘比目為郎
博士繇是易有京氏之學

費直字長翁東萊人也治易為郎至單父令長於卦筮
亡章句徒以彖象繫辭十篇文言解說上下經瑯邪王
璜平中能傳之璜又傳古文尚書

高相沛人也治易與費公同時其學亦亡章句專說陰
陽災異自言出於丁將軍傳至相相授子康及蘭陵毋
將永康以明易為郎永至豫章都尉及王莽居攝東郡
太守翟誼舉兵誅莽事未發康侯知東郡有兵私語門

人門人上書言之後數月翟誼兵起莽召問對受師高
康莽惡之以為惑眾斬康繇是易有高氏學高費皆未
嘗立於學官

伏生濟南人也

張晏曰名勝伏生碑云也

故為秦博士孝文時求能

治尚書者天下亡有聞伏生治之欲召伏生時年九十

餘老不能行乃詔太常使掌故朝錯往受之秦時焚書

伏生壁藏之其後大兵起流亡及漢定伏生求其書亡

數十篇獨得二十九篇即以教于齊魯之間齊學者由

此頗能言尚書山東大師亡不涉尚書以教伏生教濟

南張生及歐陽生張生為博士而伏生孫以治尚書徵弗能明定是後魯周霸雒陽賈嘉頗能言尚書云

歐陽生字伯和千乘人也事伏生授兒寬寬又受業孔安國至御史大夫自有傳寬有俊材初見武帝語經學上曰吾始以尚書撲弗好及聞寬說可觀乃從寬問一篇歐陽大小夏侯氏各皆出於寬寬授歐陽生子世世相傳至曾孫高子陽為博士高孫地餘長賓以太子中庶子授太子後為博士論石渠元帝即位地餘侍中貴幸至少府戒其子曰我死官屬即送汝財物慎勿受汝

九卿儒者子孫以廉潔著可以自成及地餘死少府官屬共送數百萬其子不受天子聞而嘉之賜錢百萬地餘少子政為王莽講學大夫由是尚書世有歐陽氏學林尊字長賓濟南人也事歐陽高為博士論石渠後至少府太子大傳授平陵平當梁陳翁生當至丞相自有傳傳翁生信都太傅家世傳業由是歐陽有平陳之學翁生授琅邪殷崇楚國龔勝崇為博士勝右扶風自有傳而平當授九江朱普公文上黨鮑宣普為博士宣司隸校尉自有傳徒眾尤盛知名者也

夏侯勝其先夏侯都尉從濟南張生受尚書以傳族子始昌始昌傳勝勝又事同郡簡卿簡卿者兒寬門人勝傳從兄子建建又事歐陽高勝至長信少府建太子太傅自有傳由是尚書有大小夏侯之學

周堪字少卿齊人也與孔霸俱事大夏侯勝霸為博士堪譯官令論於石渠經為最高後為太子太傅而孔霸以太中大夫授太子及元帝即位堪為光祿大夫與蕭望之並領尚書事為石渠所譖皆免官望之自殺上愍之擢堪為光祿勳堪授牟卿及長安許商長伯牟卿為

博士霸以帝師賜號褒成君傳子光亦事牟卿至丞相自有傳由是大夏侯有孔許之學商善為筭著五行論歷四至九卿號其門人沛唐林子高為德行平陵吳章偉君為言語重泉王吉少音為政事齊炗欽幼卿為文學炗音桂王莽時林吉為九卿自吏上師冢大夫博士郎吏為許氏學者各從門人會車數百兩儒者榮之欽章皆為博士徒眾尤盛章為王莽所誅

張山拊字長賓平陵人也事小夏侯建為博士論石渠至少府授同縣李尋鄭寬中少君山陽張無故子儒信

都秦恭延君陳留假倉子驕無故善脩章句爲廣陵太
傳守小夏侯說文恭增師法至百萬言爲陽城內史倉
以謁者論石渠至膠東相尋善說災異爲騎都尉自有
傳寬中有雋材以博士授太子成帝即位賜爵關內侯
食邑八百戶遷光祿大夫領尚書事甚尊重會疾卒谷
永上疏乞加其葬禮賜之令謚以章尊師傅之德於是
上弔贈寬中甚厚由是小夏侯有鄭張秦假李氏之學
寬中授東郡趙玄無故授沛唐尊恭授魯鴻賓賓爲博
士尊王莽太傅玄哀帝御史大夫至大官知名者

孔氏有古文尚書孔安國以今文字讀之因以起其家
逸書得十餘篇蓋尚書茲多於是矣遭巫蠱未立於學

官安國爲諫大夫授都尉朝

朝名都尉姓

而司馬遷亦從安

國問故遷書載堯典禹貢洪範微子金縢諸篇多古文
說都尉朝授膠東庸生庸生授清河胡常少子以明穀
梁春秋爲博士部刺史又傳左氏嘗授號徐敖敖爲右
扶風掾又傳毛詩授王璜平陵塗惲子真子真授河南
桑欽君長王莽時諸學皆立劉歆爲國師璜惲等皆貴
顯世所傳百兩篇者出東萊張霸分析合二十九篇以

爲數十又采左氏傳書叙爲作首尾凡百二篇篇或數
簡文意淺陋成帝時求其古文者霸以能爲百兩徵以
中書校之非是霸辭受父父有弟子尉氏樊竝時太中
大夫平當侍御史周敞勸上存之後樊竝謀反廼黜其
書

申公魯人也少與楚元王交俱事齊人浮丘伯受詩漢
興高祖過魯申公以弟子從師入見于魯南宮呂太后
時浮丘伯在長安楚元王遣子郢與申公俱卒學元王
薨郢嗣立爲楚王令申公傳太子戊戊不好學病申公

及戊立爲王胥靡申公申公媿之歸魯退居家教終身
不出門復謝賓客獨王命召之乃往弟子自遠方至受
業者千餘人申公獨以詩經爲訓故以教亡傳疑者則
闕弗傳蘭陵王臧旣從受詩已通事景帝爲太子少傅免
去武帝初即位臧乃上書宿衛累遷一歲至郎中今及代
趙綰亦嘗受詩申公爲御史大夫綰臧請天子立明堂以
朝諸侯不能就其事乃言師申公於是上使使東帛加璧
安車以蒲裹輪駕駟迎申公弟子二人乘軺傳從至見天
子天子問治亂之事申公時八十餘老對曰爲治者不

至多言顧力行何如耳是時上方好文辭見申公對默
然然已招致則以為太中大夫舍魯邸議明堂事實太
后好老子不說儒術得綰職之過以讓上曰此欲復為
新垣平也上因發明堂下綰職吏皆自殺申公亦以疾
免歸數年卒弟子為博士者十餘人孔安國至臨淮太
守周霸膠西內史夏寬城陽內史碭魯賜東海太守蘭
陵繆生長沙內史徐偃膠西中尉鄒人闕門慶忌膠東
內史其治官民皆有廉節其學官弟子行雖不備而至
於大夫郎中掌故以百數申公卒以詩春秋授而瑕丘

江公盡能傳之徒眾最盛及魯許生免中徐公皆守學
教授韋賢治詩事博士大江公及許生又治禮至丞相
傳子玄成以淮陽中尉論石渠後亦至丞相玄成及兄
子賞以詩授哀帝至大司馬車騎將軍自有傳由是魯
詩有韋氏學

王式字翁思東平新挑人也事免中徐公及許生式為
昌邑王師昭帝崩昌邑王嗣位以行淫亂廢昌邑羣臣
皆下獄誅惟中尉王吉郎中令龔遂以數諫減死論式
繫獄當死治事使者責問曰師何以亡諫書式對曰臣

以詩三百五篇朝夕授王至於忠臣孝子之篇未嘗不
為王反復誦之也至於危亡失道之君未嘗不流涕為
王深陳之也臣以詩三百五篇諫是以亡諫書使者以
聞亦得減死論歸家不教授山陽張長安幼君長安先
事式後東平唐長賓沛褚少孫亦來事式問經數篇式
謝之曰聞之於師具是矣自潤色之不肯復授唐生褚
生應博士弟子選詣博士摳衣登堂頌禮甚嚴頌音試
誦說有法疑者丘蓋不言丘蓋者疑也諸博士驚問何師對
曰事式皆素聞其賢共薦式詔除下為博士式徵來衣

博士衣而不冠曰刑餘之人何宜復充禮官既至止舍
中會諸大夫博士共持酒肉勞式皆注意高仰之博士
江公世為魯詩宗至江公著孝經說心嫉式謂歌吹諸
生曰歌驪駒式曰聞之於師歌驪駒主人歌客毋庸
歸今日諸君為主人日尚早未可也江翁曰經何以言
式曰在曲禮江翁曰何狗曲也式恥之陽醉過墜上音蕩下音
地音式客罷讓諸生曰我本不欲來諸生彊勸我竟為豎
子所辱遂謝病免歸終於家張生唐生褚生皆為博士
張生論石渠至淮陽中尉唐生楚大傳由是魯詩有張

唐褚氏之學張生兄子游鄉爲諫大夫以詩授元帝其
門人琅邪王扶爲泗水中尉授陳留許晏爲博由士是
張家有許氏學初薛廣亦事王式以博士論石渠授龔
舍廣德至御史大夫舍泰山太守皆有傳

轅固生齊人也以治詩孝景時爲博士與黃生爭論於
上前黃生曰湯武非受命乃殺也固曰不然夫桀紂荒
亂天下之心皆歸湯武湯武因天下之心而誅桀紂桀
紂之民弗爲使而歸湯武湯武不得已而立非受命爲
何黃生曰冠雖弊必加於首履雖新必貫於足何者上

下之分也今桀紂雖失道然君上也湯武雖聖臣下也
夫士有失行臣下不能正言匡過以尊天子反因過而
誅之代立南面非殺而何固曰必若所云則是高皇帝
代秦即天子之位非邪於是上曰食肉毋食馬肝未爲
不知味也言學者毋言湯武受命不爲愚遂罷竇太后
好老子書召問固固對曰此家人言耳太后怒曰安得
司空城旦書乎

城旦書刑書也道家以儒
家爲急故此於律令云

乃使固入圈

擊甌上知太后怒而固直言無罪乃假固利兵下圈刺
甌正中其心甌應手而倒太后默然亡以復罪後上以

固廉直拜爲清河王太傅久之病免孝武帝初即位復以賢良徵諸儒多嫉毀曰固老罷歸之時固已九十餘矣公孫弘亦徵及目而事固固曰公孫子務正學以言無曲學以阿世諸齊以詩顯貴皆固之弟子也昌邑太傅夏侯始昌最明自有傳

后蒼字近君東海郟人也事夏侯始昌始昌通五經蒼亦通詩禮爲博士至少府授翼奉蕭望之匡衡奉爲諫大夫望之前將軍衡丞相皆有傳衡授瑯邪師丹伏理旂君潁川蒲昌君都君都爲詹事理高密太傅家世傳

業丹大司空自有傳由是齊詩有翼匡師伏之學蒲昌授九江張邴琅邪皮容皆至太官徒衆尤盛

韓嬰燕人也孝文時爲博士景帝時至常山王太傅嬰推詩之意而爲內外傳數萬言其語頗與齊魯間殊然其歸一也淮南賁生受之賁音肥燕趙間言詩者由韓生

韓生亦以易授人推易意而爲之傳燕趙間好詩故其易微唯韓氏自傳之武帝時嬰嘗與董仲舒論於上前其人精悍處事分明仲舒不能難也後其孫商爲博士孝宣時涿郡韓生其後也以易徵待詔殿中曰所受易

即先太傅所傳也嘗受韓詩不如韓氏易深太傅故專傳之司隸校尉蓋寬饒本受易於孟喜見涿郡韓生說易而好之即更從受焉

趙子河內人也事燕韓生授同郡蔡誼誼至丞相自有

傳誼授同郡食子公

食音嗣

與王吉吉為昌邑中尉自有

傳食生為博士授泰山栗豐吉授淄川長孫順順為博士豐部刺史由是韓詩有王食長孫之學豐授山陽張就順授東海髮福皆至大官徒衆尤盛

毛公趙人也治詩為河間獻王博士授同國貫長卿長

卿授解延年延年為阿武令授徐敖教授九江陳俠為

王莽講學大夫由是言毛詩者本之徐敖

漢興魯高禮堂生博士

禮十七篇而魯徐生善為頌

頌讀與容同容貌威儀也

孝文

時徐生以頌為禮官大夫傳子至孫延襄襄其資性善為頌不能通經延頌能未善也襄亦以頌為大夫至廣陵內史延及徐氏弟子公戶滿意桓生單次皆為禮官大夫而瑕丘蕭奮以禮至淮陽太守諸言禮為頌者由

徐氏

孟卿東海人也事蕭奮以授后倉魯閭丘卿倉說禮數

萬言號曰后氏曲臺記

在曲臺按書著記因以授沛聞

人通漢子方梁戴德延君戴聖汝君沛慶普孝公孝公
為東平太傅德號大戴為信都太傅聖號小戴以博士
論石渠至九江太守由是禮有大戴小戴慶氏之學通
漢以太子舍人論石渠至中山中尉普授魯夏侯敬又
傳族子咸為豫章太守大戴授琅邪徐良游卿為博士
州牧郡守家世傳業小戴授梁人橋仁李卿楊榮子孫
仁為大鴻臚家世傳業榮琅邪太守由是大戴有徐氏
小戴有橋楊氏之學

臣謹按戴聖為九江太守治行多不法前刺史以
其大儒優容之及何武為刺史聖懼自免後為博
士毀武於朝廷武聞之終不揚其惡聖之子賓客
為群盜為人捕繫廬江聖自以子必死武之手而
武平心決之卒得不死自是慄服且以二戴之名
與聖人之經並行而身為臧吏子為盜賊猶不知
非已而復謗人有子如此猶冀生平曾跼蹐之不
如也觀此則為儒者不可不鑒用儒者亦不可不

審

胡毋生字子都齊人也治公羊春秋爲景帝博士與董仲舒同業仲舒著書稱其德年老歸教於齊齊之言春秋者宗事之公孫弘亦頗受焉而董仲舒爲江都相自有傳弟子遂業者蘭陵褚大東平羸公廣川段仲溫呂步舒大至梁相步舒丞相長史唯羸公守學不失師法爲昭帝諫大夫授東海孟卿魯睦孟孟爲符節令坐說災異誅自有傳

嚴彭祖字公子東海下邳人也與顏安樂俱事睦孟孟弟子百餘人唯彭祖安樂爲明質問疑誼各持所見孟曰春秋之意在二子矣孟死彭祖安樂各顯門教授由是公羊春秋有顏嚴之學彭祖爲宣帝博士至河南東郡太守以高第入爲左馮翊遷太子太傅廉直不事權貴或說曰天時不勝人事君以不修小禮曲意亡貴人左右之助經誼雖高不至宰相願少自勉彊彭祖曰凡通經術固當脩行先王之道何可委曲從俗苟求富貴乎彭祖竟以太傅官終授琅邪王中爲元帝少府家世傳業中授同郡公孫文東門雲雲爲荊州刺史文東平太傅徒衆尤盛雲坐爲江賊拜辱命下獄誅

顏安樂字公孫魯國薛人睦孟姊子也家貧爲學精力
官至齊郡太守丞後爲仇家所殺安樂授淮陽泠豐次
君淄川任公公爲少府豐淄川太守由是顏家有泠任
之學始貢禹事嬴公成於睦孟至御史大夫疏廣事孟
卿至太子太傅皆自有傳廣授琅邪筦路路爲御史中
丞禹授潁川堂谿惠惠授泰山冥都都爲丞相史都與
路又事顏安樂故顏氏復有完其之學路授孫寶爲大
司農自有傳豐授馬宮琅邪咸咸爲郡守九卿徒衆
尤盛官至大司徒自有傳

瑕丘江公丘穀梁春秋及詩於魯申公傳子至孫爲博
士武帝時江公與董仲舒並仲舒通五經能持論善屬
文江公吶於口上使與董仲舒議不及仲舒而丞相公
孫弘本爲公羊學比輯其義卒用董生於是上因尊公
羊家詔太子授公羊春秋由是公羊大興太子旣通復
私問穀梁而善之其後浸微唯魯榮廣王孫皓星公二
人受焉廣盡能傳其詩春秋高材捷敏與公羊大師睦
孟等論數困之故好學者頗復受穀梁沛蔡千秋少君
梁周慶幼君丁姓子孫皆從廣受千秋又事皓星公爲

學最篤宣帝即位聞衛太子好穀梁春秋以問丞相韋
賢長信少府夏侯勝及侍中樂陵侯史高皆魯人也言
穀梁子本魯學公羊氏乃齊學也宜與穀梁時千秋為
郎召見與公羊家竝說上善穀梁說擢千秋為諫大夫
給事中後有過左遷平陵令復求能為穀梁者莫及千
秋上愍其學且絕乃以千秋為郎中戶將選郎十人從
受汝南尹更始翁君本自事千秋能說矣會千秋病死
徵江公孫為博士劉向以故諫大夫通達待詔受穀梁
欲令助之江博士復死乃徵周慶丁姓待詔保宮使卒
授十人自元康中始講至甘露元年積十餘歲皆明習
乃召五經名儒太子太傅蕭望之等大議殿中平公羊
穀梁同異各以經處是非時公羊博士嚴彭祖侍郎申
輓伊推宋顯穀梁議郎尹更始待詔劉向周慶丁姓竝
論公羊家多不見從願請內侍郎許廣使者亦並內穀
梁家中郎王亥各五人議三十餘事望之等十一人各
以經誼對多從穀梁由是穀梁之學大盛慶姓皆為博
士姓至中山太傅授楚申章昌曼君申章姓也名昌字曼君為博
士至長沙太傅徒眾尤盛尹更始為諫大夫長樂戶將

又受左氏傳取其變理合者以爲章句傳子咸及翟方
進琅邪房鳳咸至大司農方進丞相自有傳

房鳳字子元不其人也以射策乙科爲太史掌故太常
舉方正爲縣令都尉失官大司馬驃騎將軍王根奏除
補長史薦鳳明經通達擢爲光祿大夫遷五官中郎將
時光祿勳王龔以外屬內卿與奉車都尉劉歆共校書
三人皆待中歆白左氏春秋可立哀帝納之以問諸儒
皆不對歆於是數見丞相孔光爲言左氏以求助光卒
不肯唯鳳龔許歆遂共移書責讓太常博士語在歆傳

大司空師丹奏歆非毀先帝所立上於是出龔等補吏
龔爲弘農歆河內鳳九江太守至青州牧始江博士授
胡常常授梁蕭秉君房王莽時爲講學大夫由是穀梁
春秋有尹胡申章房氏之學

漢興北平侯張蒼及梁太傅賈誼京兆尹張敞太中大
夫劉公子皆修春秋左氏傳誼爲左氏傳訓故授趙人
貫公爲河間獻王博士子長卿爲蕩陰令授清河張禹
長子禹與蕭望之同時爲御史數爲望之言左氏望之
善之上書數次稱說後望之爲太子太傅薦禹於宣帝

徵禹待詔未及問會疾死禹授尹更始更始傳子咸及
翟方進胡常常授黎陽賈護季君哀帝時待詔爲郎授
蒼梧陳欽子佚以左氏授王莽至將軍而劉歆從尹咸
及翟方進受由是言左氏者本之賈護劉歆

班氏曰自武帝立五經博士開弟子貢設科射策勸以
官祿訖於元始百有餘年傳業者寔盛枝葉蕃滋一經
說至百餘萬言大師衆至千餘人蓋利祿之路然也初
書惟有歐陽禮后易楊春秋公羊而已至孝宣世復立
大小夏侯尚書大小戴禮施孟梁丘易穀梁春秋至元
帝世復立京氏易平帝時又立左氏春秋毛詩逸禮古
文尚書所以罔羅遺失兼而存之是在其中矣

後漢

范氏曰昔王莽更始之際天下散亂禮樂分崩典文殘
落及光武中興愛好經術未及下車而先訪儒雅採求
闕文補綴漏逸先是四方學士多懷挾圖書遁逃林藪
自是莫不抱負墳策雲會京師范升陳元鄭興杜林衛
宏劉昆桓榮之徒繼踵而集於是立五經博士各以家
法教授易有施孟梁丘京氏尚書歐陽大小夏侯詩齊

晉韓毛禮大小戴春秋嚴顏凡十四博士太差差次總
領焉建武五年乃脩起太學稽式古典邊豆干戚之容
備之於列服方領習矩步者委它乎其中中元元年初
建三雍明帝即位親行其禮天子始冠通天衣日月備
法物之駕盛清道之儀坐明堂而朝群后登靈臺以望
雲物袒割辟雍之上尊養三老五更饗射禮畢帝正坐
自講諸儒執經問難於前冠帶縉紳之人園橋門而觀
聽者蓋億萬計其後復爲功臣子孫四姓末屬別立校
舍搜選高能以受其業自期門羽林之士悉令通孝經

章句匈奴亦遣子入學濟濟乎洋洋乎盛於永平矣建
初中大會諸儒於白虎觀考詳同異連月乃罷肅宗親
臨稱制如石渠故事顧命史臣著爲通義又詔高才生
受古文尚書毛詩穀梁左氏春秋雖不立學官然皆擢
高第爲講郎給事近署所以網羅遺逸博存衆家孝和
亦數幸東觀覽閱書林及鄧后稱制學者頗懈時樊準
徐防並陳敦學之宜又言儒職多非其人於是制詔公
卿妙簡其選三署郎能通經術者皆得察舉自安帝覽
政薄於藝文博士倚席不講朋徒相視怠散學舍頽敝

鞠爲園蔬牧兒芻豎至於新刈其下順帝感翟酺之言
乃更修黌宇凡所造構二百四十房千五百五十室試
明經下第補弟子增甲乙之科貢各十人除郡國耆儒
皆補郎舍人太初元年梁太后詔曰大將軍下至六百
石悉遣子就學每歲輒於鄉射月一饗會之以此爲常
自是遊學增盛至三萬餘生然章句漸踈而多以浮華
相尚儒者之風蓋衰矣黨人旣誅其高名善士多坐流
廢後遂至忿爭更相言告亦有私行金貨定蘭臺漆書
經字以合其私文熹平四年靈帝乃詔諸儒正定五經
刊於石碑爲古文篆隸三體書法以相參檢樹之學門
使天下咸取則焉初光武遷還洛陽其經牒秘書載之
二千餘兩自此以後參倍於前及董卓移都之際吏民
擾亂自辟雍東觀蘭臺石室宣明鴻都諸藏典冊文章
競共剖散其練帛圖書大則連爲帷蓋小乃制爲滕囊
及王允所收而西者裁七十餘乘道路艱遠復棄其半
矣後長安之亂一時焚蕩莫不泯盡焉東京學者猥衆
難以詳載今但錄其能通經名家者以爲儒林篇其自
有列傳者則不兼書若師資所承宜標名爲證者乃著

之云

昆字桓公陳留東昏人梁孝王之胤也少習容禮平
帝時受施氏易於沛人戴賓能彈雅琴知清角之操王
莽世教授弟子恒五百餘人每春秋饗射常備列典儀
以素木瓠葉爲俎豆桑弧蒿矢以射莞首每有行禮縣
宰輒率吏屬而觀之王莽以昆多聚徒衆私行大禮有
僭上心乃繫昆及家屬於外黃獄尋莽敗得免旣而天
下大亂昆避難河南負犢山中建武五年舉孝廉不行
遂逃教授於江陵光武聞之即除爲江陵令時縣連年

火災昆輒向火叩頭多能降雨止風徵拜議郎稍遷侍
中弘農太守先是殺黽驛道多虎災行旅不通昆爲政
三年虎皆負子渡河帝聞而異之二十二年徵代杜林
爲光祿勳詔問昆曰前在江陵反風滅火後守弘農虎
北渡河行何德政而致是事昆對曰偶然耳左右皆笑
其質訥帝歎曰此乃長者之言也顧命書諸策乃令以
經入授皇太子及諸王小侯五十餘人二十七年拜騎
都尉三十年以老乞骸骨詔賜洛陽第舍以千石祿終
其身中元二年卒子軼字君文傳昆業門徒亦盛永平

中為太子中庶子建初中稍遷宗正卒官遂世掌宗正焉

注丹字子玉風俗通注音圭南陽育陽人也世傳孟氏易王莽

時常避世教授專志不仕徒眾數百人建武初為博士

稍遷十一年為大鴻臚作易通論七篇世號注君通丹

學義研深易家宗之稱為大儒十七年卒於官年七十

時中山雒陽鴻字孟孫姓雒陽名鴻音胡瓦反亦以孟氏易教授

有名稱永平中為少府

任安字定祖廣漢綿竹人也少游太學受孟氏易兼通

數經又從同郡楊厚學圖讖究極其術時人稱曰欲知

仲桓問任安又曰吾今行古任定祖學終還家教授諸

生自遠而至初仕州郡太尉再辟除博士公車徵皆稱

疾不就州牧劉焉表薦之許王塗隔塞詔命竟不至年

七十九建安七年卒于家

揚政字子行京兆人也少好學從代郡范升受梁丘易

善說經書京師為之語曰說經鏗鏗揚子行教授數百

人范升嘗為出婦所告坐繫獄政乃肉袒以箭貫耳抱

刑子潛伏道傍候車駕而持章叩頭大言曰范升三娶

惟有一子今適三歲孤之可哀武騎虎賁懼驚乘輿舉
弓射之猶不肯去旄頭又以戟義政傷胷政猶不退哀
泣辭請有感帝心詔曰乞楊生師即尺一出升政由是
顯名政爲人嗜酒不拘小節果敢自矜然篤於義時帝
壻梁松皇后弟陰就皆慕其聲名而請與交友政每與
言論常切磋懇至不爲屈正嘗詣楊虛侯馬武武難見
政稱疾不爲起政入戶徑升牀排武臂責之曰卿蒙國
恩備位藩輔不思求賢以起殊寵而驕天下英俊此非
養身之道也今日動者刀入臂武諸子及左右皆大驚

以爲見劫操兵滿側政顏色自若會陰就至責數武令
爲交友其剛果任情皆如此也建初中官至左中郎將
張興字君上潁川鄢陵人也習梁丘易以教授建武中
舉孝廉爲郎謝病去復歸聚徒後辟司徒馮勤府舉爲
孝廉稍遷博士永平初遷侍中祭酒十年拜太子少傅
顯宗數訪問經術旣而聲稱著聞弟子自遠至者著錄
且萬人爲梁丘家宗十四年卒於官子鮪傳興業位至
張掖屬國都尉

戴憑字次仲汝南平輿人也習京氏易年十六郡舉明

經徵試博士拜郎中時詔公卿大會群臣皆就席憑獨
立光武問其意憑對曰博士說經皆不如臣而坐居臣
上是以不得就席帝即召上殿令與諸儒難說憑多所
解釋帝善之拜為侍中數進見問得失帝謂憑曰侍中
當匡補國政勿有隱情憑對曰陛下嚴帝曰朕何用嚴
憑曰伏見前太尉西曹掾蔣遵清亮忠孝學通古今陛
下納膚受之愬遂致禁錮臣以是為嚴帝怒曰汝南子
欲復黨乎憑出自繫廷尉有詔勅出後復引見憑謝曰
臣無寒暑諤之節而有狂瞽之言不能以尸伏諫偷生苟

活誠慙聖朝帝即勅尚書解導禁錮拜憑虎賁中郎將
以侍中兼領之正旦朝賀百僚畢會帝令群臣能說經
者更相難詰義有不通輒奪其席以益通者憑遂重坐
五十餘席故京師為之語曰解經不窮戴侍中在職十
八年卒於官賜東園梓器錢二十萬時南陽太守魏滿
字叔牙亦習京氏易教授永平中至弘農太守

孫期字仲彘濟陰成武人也少為諸生習京氏易古文
尚書家貧事母至孝牧豕於大澤中以奉養焉遠人從
其學者皆執經龍畔以追之里落化其仁讓黃巾賊起

過期里陌相約不犯孫先生舍郡舉方正遣吏齎羊酒
請期期驅豕入草不顧司徒黃琬特辟不行終於家建
武中范升傳孟氏易以授楊政而陳元鄭衆皆傳費氏
易其後馬融亦爲其傳融授鄭玄玄作易注荀爽又作
易傳自是費氏興而京氏遂衰

歐陽歙字王思樂安千乘人也自歐陽生傳伏生尚書
至歙八世皆爲博士歙旣傳業而謙恭好禮讓王莽時
爲長社宰更始立爲原武令光武平河北到原武見歙
在縣修政遷河南都尉後行太守事光武即位始爲河

南尹封被陽侯建武五年坐事免官明年拜楊州牧遷
汝南太守推用賢俊政稱異迹九年更封夜侯歙在郡
教授數百人視事九歲徵爲大司徒坐在汝南減罪下
餘萬發覺下獄諸生守闕爲歙求哀者千餘人至有自
髡剔者平原禮震年十七聞獄當斷馳之京師行到河
內獲嘉縣自繫上書求代歙死曰伏見臣師大司徒歐
陽歙學爲儒宗八世博士而以臧咎當伏重辜歙門單
子幼未能傳學身死之後求爲廢絕上令陛下獲殺賢
之譏下使學者喪師資之益乞殺身以代歙命書奏而

歆已死獄中歆掾陳元上書追訟之言甚切至帝乃賜棺木贈印綬膊練三千匹子復嗣後卒無子國除濟陰曹曾字伯山從歆受尚書誦徒三千人位至諫議大夫子祉河南尹傳父業教授又陳留陳弇字叔明亦授歐陽尚書於司徒丁鴻仕為斬長

牟長字君高樂安臨濟人也其先封牟春秋之末國滅因氏焉長少習歐陽尚書不仕王莽世建武二年大司空弘特辟拜博士稍遷河內太守坐墾田不實免長自為博士及在河內諸生講學者常有千餘人著錄前後

萬人著尚書章句皆本之歐陽氏俗號為牟氏章句復徵為中散大夫賜告一歲卒於家子紆又以隱居教授門生千人肅宗聞而徵之欲以為博士道物故

宋登字叔陽京兆長安人也父由為太尉登少傳歐陽尚書教授數千人為汝陰令政為明能號稱神父遷趙相入為尚書僕射順帝以登明識禮樂使持節臨太學奏定典律轉拜侍中數上封事抑退權臣由是出為潁川太守市無二價道不拾遺病免卒于家汝陰人配社祠之

張馴字子雋濟陰定陶人也少游太學能誦春秋左氏傳以大夏侯尚書教授辟公府舉高第拜議郎與蔡邕共奏定六經文字擢拜侍中典領祕書近署甚見納異多因便宜陳政得失朝廷嘉之遷丹陽太守化有惠政光和七年徵拜尚書遷大司農初平中卒於官

尹敏字幼季南陽堵陽人也少爲諸生初習歐陽尚書後受古文兼善毛詩穀梁左氏春秋建武二年上疏陳洪範消災之術時光武方草創天下未遑其事命敏待詔公車拜郎中辟大司空府帝以敏博通經記令授圖

讖使蠲去崔發所爲王莽著錄比次敏對曰讖書非聖人所作其中多近鄙別字頗類世俗之辭恐疑誤後生帝不納敏因其闕文增之曰君無口爲漢輔帝見而怪之召敏問其故敏對曰臣見前人增損圖書敢不自量竊幸萬一帝深非之雖竟不罪而亦以此沈滯與班彪親善每相遇輒日旰忘食夜分不寢自以爲鐘期伯牙莊周惠施之相得也後三遷長陵令永平五年詔書捕男子周慮慮素有名稱而善於敏敏坐繫免官及出嘆曰瘖聾之徒真世之有道者也何謂察察而遇斯患乎

十一年除郎中遷諫議大夫卒於家

周防字偉公汝南汝陽人也父揚少孤微常脩逆旅以
供過客而不受其報防年十六仕郡小吏光祖巡狩汝
南召掾史試經防尤能誦讀拜爲守丞防以未冠謁去
師事徐州刺史蓋豫受古文尚書經明舉孝廉拜郎中
撰尚書雜記三十二篇四十萬言太尉張禹薦補博士
稍遷陳留太守坐法免卒於家年七十八子舉自有傳
孔僖字仲和魯國魯人也自安國以下世傳古文尚書
毛詩魯祖父子建少游長安與崔篆友善及篆仕王莽

爲建新大尹嘗勸子建仕對曰吾有布衣之心子有袞
冕之志各從所好不亦善乎道旣乖矣請從此辭歸終
於家僖與崔篆孫駟復相交善同游太學習春秋因讀
吳王夫差時事僖發書歎曰若是所謂畫龍不成反爲
狗者駟曰然昔孝武皇帝始爲天子年方十八崇信聖
道師則先王五六年間號勝文景及後恣已忘其前之
爲善僖曰書傳若此多矣鄰房生梁郁儻和之曰如此
武帝亦是狗邪僖駟默然不對郁怒恨之陰上書告駟
僖誹謗先帝刺譏當世事下有司駟詣吏受訊僖以吏

捕方至恐誅乃上書肅宗自訟曰臣之愚意以為凡言
誹謗者謂實無此事而虛加誣之也至如孝武皇帝政
之美惡顯在漢史坦如日月是為直談書傳實傳實事
非虛謗也夫帝者為善則天下之善咸歸焉其不善則
天下之惡亦萃焉斯皆有以致之故不可以誅於人也且
陛下即位以來政教未過而德澤有加天下所具知也
臣等獨何譏刺哉假使所非實是則固應悛改儻其不
當亦宜含忍又何罪焉陛下不推原大數深自為計徒
肆私忿以快其意臣等受戮死即死矣顧天下之人必

回視易慮以此事闕陛下心自今以後苟見不可之事
終莫復言者矣臣之所以不愛其死猶敢極言者誠為
陛下深惜此大業陛下若不自惜則臣何賴焉昔齊桓
公親揚其先君之惡以唱管仲然後羣臣得盡其心今
陛下乃欲以十世之武帝遠諱實事豈不與桓公異哉
臣恐有司卒然見構銜恨蒙枉不得自叙使後世論者
擅以陛下有所方比寧可復使子孫追掩之乎謹詣闕
伏待重誅帝始亦無罪僖等意及書奏立詔勿問拜僖
蘭臺令史元和二年春帝東巡狩還過魯幸闕里以太

罕祠孔子及七十二人大會孔氏男子二十以上者六
十三人命儒者講論語僖因自陳謝帝曰今日之會寧
於卿宗有光榮乎對曰臣聞明王聖主莫不尊師貴道
今陛下親屈萬乘辱臨敝里此乃崇禮先師增輝聖德
至於光榮非所敢承帝大笑曰非聖者子孫焉有斯言
乎遂拜僖郎中賜褒成侯損及孔氏男女錢帛詔僖從
還京師使校書東觀冬拜臨晉令崔駰以家林筮之謂
爲不吉止僖曰子盍辭乎僖曰學不爲人仕不擇官凶
言由已而由卜乎在縣三年卒官遺令即葬二子長彥

季彥並十餘歲蒲坂令許君然勸令反魯對曰今載柩
而歸則違父命舍墓而去心所不忍遂留華陰長彥好
章句學季彥守其家業門徒數百人延光元年河西大
雨雹大者如斗安帝詔有道術之士極陳變眚召季彥
見於德陽殿帝親問其故對曰此皆陰乘陽之徵也今貴
臣擅權母后黨盛陛下宜修聖德慮此二者帝嘿然左
右皆惡之舉孝廉不就三年年四十七終於家初平帝
時王莽秉政乃封孔子後孔均爲褒成侯追謚孔子爲
褒成宣尼及王莽敗失國建武十三年光武復封均子

志為襄成侯志卒子損嗣永平四年徙封襄亭侯損卒
子曜嗣曜卒子完嗣世世相傳至獻帝初國絕

楊倫字仲理陳留東昏人也少為諸生師事司徒丁鴻
習古文尚書為郡文學掾更歷數時志乖於時以不能
人間事遂去職不復應州郡命講授於大澤中弟子至
千餘人元初中郡禮請三府並辟公車徵皆辭疾不就
後特徵博士為清河王傅是歲安帝崩倫輒棄官奔喪
號泣闕下不絕聲閭太后以其專擅去職坐抵罪順帝
即位詔免倫刑遂留行喪于恭陵服闋徵拜侍中是時

邵陵令任嘉在職貪穢因遷武威太守後有人奏嘉臧
罪千萬徵考廷尉其所牽染將相大臣百有餘人倫乃
上書曰臣聞春秋誅惡及本本誅則惡消振裘持領領
正則毛理今任嘉所坐狼籍未受辜戮猥以垢身改典
八郡自非案坐舉者無以禁絕姦萌往者湖陸令張疊
前令駟賢徐州刺史劉福等釁穢既章咸伏其誅而豺
狼之吏至今不絕者豈非本舉之主不加之罪乎昔齊
桓之霸殺姦臣五人并及舉者以弭謗讒當斷不斷黃
石所戒夫聖王所以聽僮夫匹婦之言者猶塵加嵩岱

霧集淮海雖未有益不為損也書奏有司以倫言切直
辭不遜順下之尚書奏倫探知密事徵以求直坐不敬
結鬼薪詔書以倫數進忠言特原之免歸田里陽嘉二
年徵拜太中大夫將軍梁商以為長史諫諍不合出補
恒山王傳病不之官詔書勅司隸催促發遣倫乃留河
內朝歌以疾自上曰有留死一尺無北行一寸刎頸不
易九裂不恨匹夫所執疆於三軍固敢有辭帝乃下詔
曰倫出幽升高寵以藩傳稽留王命擅止道路託疾自
從苟肆殆志遂徵詣廷尉尋有詔原罪倫前後三徵皆

以直諫不合既歸閉門講授自絕人事公車復徵遜遁
不行卒於家中興北海字融習大夏侯尚書東海王良
習小夏侯尚書沛國桓榮習歐陽尚書榮世習相傳授
東京最盛扶風杜林傳古文尚書林同郡賈逵為之作
訓馬融作傳鄭玄注解由是古文尚書遂顯於世

高詡字季回平原般人

般下

也滿切曾祖父嘉以魯詩授元

帝仕至上谷太守父容少傳嘉學哀平間為光祿大夫
詡以父任為郎中世傳魯詩以信行清操知名王莽篡
位父子稱盲逃不仕莽世光武即位大司空宋弘薦詡

徵為郎除符離長去官後徵為博士建武十一年拜大
司農在朝以方正稱十三年卒官賜錢及冢田

包咸字子良會稽曲阿人也少為諸生受業長安師事

博士右師右師姓也細君習魯詩論語王莽末去歸鄉里於

東海界為赤眉賊所得遂見拘執十餘日咸晨夜誦經

自若賊異而遣之因住東海立精舍講授光武即位乃

歸鄉里太守黃讜署戶曹史欲召咸入授其子咸曰禮

有來學而無往教讜遂遣子師之舉孝廉除郎中建武

中入授皇太子論語又為其章句拜諫議大夫侍中右

中郎將永平五年遷大鴻臚每進見賜以几杖入屏不

趨贊事不名經傳有疑輒遣小黄門就舍即問顯宗以

咸有師傅恩而素清苦常特賞賜珍玩奉祿增於諸卿

咸皆散與諸生乏貧者病篤帝親輦駕臨視八年年七

十二卒於官子福拜郎中亦以誦語入授和帝

魏應字君伯任城人也少好學建武初詣博士受業習

魯詩閉門誦習不交僚黨京師稱之後歸為郡吏舉明

經除濟陰王文學以疾免官授山澤中徒衆常數百

人永平初為博士再遷侍中十三年遷大鴻臚十八年

拜光祿大夫建初四年拜五官中郎將詔入授千乘王
伉應經明行修弟子自遠方至者著錄數千人肅宗甚
重之數進見論難於前特授賞賜時會京師諸儒於白
虎觀講論五經同異使應重掌難問侍中溥于恭奏之
帝親臨幸稱制如石渠故事明年出爲上黨太守徵拜
騎都尉卒於官

伏恭字叔齊琅邪東武人司徒湛之兄子也湛弟黯字
雅文以明齊詩改定章句作解說九篇位至光祿勳無
子以恭爲後恭性孝事所繼母甚謹少傳黯學以任爲

郎建武四年除劇令視事十三年以惠政公廉聞青州
舉爲尤異太常試經第一拜博士遷常山太守敦修學
校教授不輟由是北州多向伏氏學永平二年代梁松
爲太僕四年帝立辟雍於仁禮中拜恭爲司空儒者以
爲榮初父黯章句繁多恭以省減浮辭定爲二十萬言
在位九年以病乞骸骨罷詔賜千石奉以終其身十五
年行幸琅邪引遇如三公儀建初二年冬肅宗行饗禮
以恭爲三老年九十元和元二年卒賜葬顯節陵下子壽
官至東郡太守

任末字叔本蜀郡繁人也少習詩遊京師教授十餘年交人董奉德於洛陽病亡末躬推鹿車載其喪至墓所由是知名為郡功曹辭以病况後奔師喪於道物故臨命勅兄子造曰必致我尸於師門使死而有知魂靈不慚如其無知得土而已造從之

景鸞字漢伯廣漢梓潼人也少隨師學經涉七州之地能理齊詩施氏易兼受河洛圖緯作易說及詩解文句兼取河洛以類相從名為交集又撰禮內外記號曰禮又抄風角雜書列其占驗作興道一篇及作月令章

句凡所著述五十餘萬言數上書陳救災變之術州郡辟命不就以壽終

薛漢字公子淮陽人也世習韓詩父子以章句著名漢少傳父業善說災異讖諱教授常數百人建武初為博士受詔校定圖讖當世言詩者推漢為長永平中為千乘太守政有異迹後坐楚事辭相連下獄死弟子犍為杜撫會稽澹臺敬伯鉅鹿韓伯高最知名

杜撫字叔和犍為武陽人也少有高才受業於薛漢定韓詩章句後歸鄉里教授沈靜樂道舉動必以禮弟子

千餘人後爲驃騎將軍東平王蒼所辟及蒼就國掾史
悉補王官屬未滿歲皆自効歸時撫爲大夫不忍去倉
聞賜車馬財物遣之辟太尉府建初中爲公車令數月
卒官其所作詩題約義通學者傳之曰杜君注云

召馴字伯春九江壽春人也曾祖信臣元帝時爲少府
父建武中爲卷令倣儻不拘小節馴少習韓詩博通書
傳以志義聞鄉里號之曰德行恂恂召伯春累仕州郡
辟司徒府建初元年稍遷騎都尉侍講肅宗拜左中郎
將入授諸王帝嘉其義學恩寵甚榮出拜陳留太守賜

刀劍錢物元和二年入爲河南尹章和二年代任隗爲
光祿勳卒於官賜冢塋陪園陵孫林位至青州刺史
楊仁字文義巴郡閬中人也建武中詣師習韓詩數年
歸靜居教授仕郡爲功曹舉孝廉除郎大常上仁經中
博士仁自以年未五十不應舊科上府讓選顯宗特詔
補北宮衛士令引見問當世政迹仁對以寬和任賢抑
黜驕戚爲先又上便宜十二事皆當世急務帝嘉之賜
以縑錢及帝崩時諸馬貴盛各爭欲入宮仁被甲持戟
嚴勒門衛莫敢進者肅宗旣立諸馬共譖仁剡峻帝知

其忠愈善之拜什邡令爲政寬惠勸課掾史弟子悉令
入學其有通明經術者顯之右署或貢之朝由是義學
大興墾田千餘頃行兄喪去官後辟司徒桓虞府掾有
宋章者貪奢不法仁終不與交言同席時人畏其節後
爲閩中令卒於官

趙畢字長君會稽山陰人也少常爲縣吏奉檄迎督郵
畢恥於胥役遂棄車馬到犍爲資中詣杜撫受韓詩究
竟其術積二十年絕問不還家爲發喪制服撫卒乃歸
州召補從事不就舉有道卒于家畢著吳越春秋詩細

歷神淵蔡邕讀詩細而歎息以爲長於論衡邕還京師
傳之學者咸誦習焉時山陽張匡字文通亦習韓詩作
章句後舉有道博士徵不就卒於家

衛宏字敬仲東海人也少與河南鄭興俱好古學初九
江謝曼卿善毛詩乃爲其訓宏從曼卿受學因作毛詩
序善得風雅之旨于今傳於世後從大司空林林更受
古文尚書爲作訓旨時濟南徐巡師事宏後從林受學
亦以儒顯由是古學大興光武以爲議郎宏作漢舊儀
四篇以載西京雜事又著賦頌誄七首皆傳於世中興

後鄭衆賈逵傳毛詩後馬融作毛詩傳鄭玄作毛詩箋
董鈞字文伯犍爲資中人也習慶氏禮事大鴻臚王臨
元始中舉明經遷廩犧令病去官建武中舉孝廉辟司
徒府鈞博通古今數言政事永平中爲博士時草創五
郊祭祀及宗廟禮樂威儀章服輒令鈞參議多見從用
當世稱爲通儒累遷五官中郎將常教授門生百餘人
後坐事左轉騎都尉年七十餘卒於家中與鄭衆傳周
官經後馬融作周官傳授鄭玄玄作周官注玄本習小
戴禮後以古經校之取其義長者故爲鄭氏學玄又注

小戴所傳禮記四十篇通爲三禮焉

丁恭字子然山陽東緡人也習公羊嚴氏春秋恭學義
精明教授常數百人州郡請召不應建武初爲諫議大
夫博士封關內侯十一年遷少府諸生自遠方至者著
錄數千人當世稱爲大儒太常樓望侍中承宮長水校
尉樊儵等皆受業於恭二十年拜侍中祭酒騎都尉與
侍中劉昆俱在光武左右每事諮訪焉卒於官

周澤字穉都北海安丘人也少習公羊嚴氏春秋隱居
教授門徒常數百人建武末辟大司馬府署議曹祭酒

數月徵試博士中元元年遷黽池令奉公剋已矜恤孤
羸吏民歸愛之永平五年遷右中郎將十年拜太常澤
果敢直言數有據爭後北地太守廖信坐貪穢下獄沒
入財產顯宗以信臧物班諸廉吏唯澤及光祿勳孫堪
大司農常冲特蒙賜焉是時京師翕然在位者咸自勉
勵堪字子釋河南緱氏人也明經學有志操清白真正
愛士大夫然一毫未嘗取於人以節介氣勇自行王莽
未兵革並起宗族老弱在營保閭堪常力戰陷敵無所
回避數被劾刃宗族賴之郡中咸服其義勇建武中仕

郡縣公正廉潔奉祿不及妻子皆以供賓客及爲長史
所在有迹爲吏人所敬仰喜分明去就嘗爲縣令謁府
趨步遲緩門亭長譴堪御史堪便解印綬不之官去後
復仕爲左馮翊坐御下促急司隸校尉舉奏免官數月
徵爲侍御史再遷爲尚書令永平十一年拜光祿勳堪
清廉果於從政數有直言多見納用十八年以病乞身
爲侍中騎都尉卒於官堪行類於澤故京師號曰二穉
十二年以澤行司徒事如真澤性簡忽威儀頗失宰相
之望數月復爲太常清潔循行盡敬宗廟嘗卧病齋宮

其妻哀澤老病闕問所苦澤大怒以妻干犯齋禁遂收
送詔獄謝罪當世疑其詭激時人爲之語曰生世不諧
作太常妻一歲三百六十日三百五十九日齋 日不
齋醉如泥十八年拜侍中騎都尉後數爲三老五更建
初中致仕卒於家

鍾興字次文汝南汝陽人也少從少府丁恭受嚴氏春
秋恭薦興學行高明光武召見問以經義應對甚明帝
善之拜郎中稍遷左中郎將詔令定春秋章句去其復
重以後皇太子又使宗室諸侯從興受章句封關內侯

興自以無功不敢受爵帝曰生教訓太子及諸王侯非
大功邪興曰臣師丁恭於是復封恭而興遂固辭不受
爵卒於官

甄宇字長文北海安丘人也清靜少欲習嚴氏春秋教
授常數百人建武中爲州從事徵拜博士稍遷太子少傅
卒於官傳業子普普傳子承承尤篤學未嘗視家事講
授常數百人諸儒以承三世傳業莫不歸服之建初中
舉孝廉卒於梁相子孫傳學不絕

樓望字次子陳留雍丘人也少習嚴氏春秋操節清白

有稱鄉閭建武中趙節王栩聞其高名遣使齎玉帛請以爲師望不受後仕郡功曹永平初爲侍中越騎校尉入講省內十六年遷大司農十八年代周澤爲太常建初五年坐事左轉太中大夫後爲左中郎將教授不倦世稱儒宗諸生著錄九千餘人年八十永元十二年卒於官門生會葬者數千人儒家以爲榮

程魯字秀升豫章南昌人也受業長安習嚴氏春秋積十餘年還家講授會稽顧奉等數百人常居門下著書百餘篇皆五經通難又作孟子章句建初三年舉孝廉

遷海西令卒於官

張玄字君夏河內河陽人也少習春秋顏氏兼通數家法建武初舉明經補弘農文學遷陳倉縣丞清淨無欲專心經書方其講問乃不食終日及有難者輒爲張數家之說令擇從所安諸儒皆服其多通著錄千餘人初爲縣丞嘗以職事對府不知官曹處吏白門下責之時左扶風琅邪徐業亦大儒也聞玄諸生試引見之與語大驚曰今日相遭真解矇矣遂請上堂難問極日後玄去官舉孝廉除爲郎會顏氏博士缺玄試策第一拜爲

博士居數月諸生上言玄兼說嚴氏宣氏不宜專為顏氏博士光武且令還署未及遷而卒

李育字元春扶風漆人也少習公羊春秋沈思專精博覽書傳知名太學深為同郡班固所重固奏記薦育於驃騎將軍東平王蒼由是京師貴戚爭往交之州郡請召育到輒辭病去常避地教授門徒數百頗涉獵古學嘗讀左氏傳雖樂其文采然謂不得聖人深意以為前世陳元范升之徒更相非折而多引圖讖不據理體於是作難左氏義四十一事建初元年衛尉馬廖舉育方

正為議郎後拜博士四年詔與諸儒論五經於白虎觀育以公羊義難賈逵往返皆有理證稱為通儒再遷尚書令及馬氏廢育坐為所舉免歸歲餘復徵拜遷侍中卒於官

何休字邵公任城樊人也父豹少府休為人質朴訥口而雅有心思精研六經世儒無及者以列卿子詔拜郎中非其好也辭病而去不仕州郡進退必以禮太傳陳蕃辟之與參政事蕃敗休坐廢錮乃作春秋公羊解詁覃思不闕門十有七年又注訓孝經論語風角七分皆經

緯典謨不與守文同說又以春秋駁漢事六百餘條妙
得公羊本意休善歷筭與其師博士羊弼追述李育意
以難二傳作公羊墨守左氏膏肓穀梁廢疾黨禁解又
辟司徒群公表休道術深明宜侍帷幄倖臣不悅之乃
拜議郎屢陳忠言再遷諫議大夫光和五年卒年五十
四

服虔字子慎初名重又名祗後改爲虔河南滎陽人也
少以清苦建志入太學受業有雅才善著文論作春秋
左氏傳解行之至今又以左傳駁何休之所駁漢事六
十條舉孝廉稍遷中平末拜九江太守免遭亂行客病
卒所著賦碑誄書記連珠九憤凡十餘篇

穎容字子嚴陳國長平人也博學多通善春秋左氏師
事太尉楊賜郡舉孝廉州辟公車徵皆不就初平中避
亂荊州聚徒千餘人劉表以爲武陵太守不肯起著春
秋左氏條例五萬餘言建安中卒

謝該字文儀南陽章陵人也善明春秋左氏爲世名儒
門徒數百千人建安中河東人樂詳條左氏凝滯數十
事以問該皆爲通解之名爲謝氏釋行於世仕爲公車

司馬令以父母老託疾去官欲歸鄉里會荊州道斷不得去少府孔融上書薦之即徵還拜議郎以壽終
建武中鄭興陳元傳春秋左氏學時尚書韓歆上疏欲為左氏立博士范升與歆爭之未決陳元上書訟左氏遂以魏郡李封為左氏博士後群儒蔽固者數廷爭之及封卒光武重違衆議因不復補

臣謹按左氏起於六國公穀起於漢有左氏而後有公穀公穀據左氏事而專為浮說者也使無左氏則公穀無作矣左氏雖麗藻少實然文有經緯

而博通古今可謂大儒矣公穀之徒於章句言語之下穿鑿其義此青衿學子之事也然辭俚而意迂多齊東之言而公羊僂俗尤甚柰何漢儒交口譏排左氏不與立博士而復以公羊尊於穀梁何其倒置如此邪

許慎字叔重汝南召陵人也性淳篤少博學經籍馬融常推敬之時人為之語曰五經無雙許叔重為郡公曹舉孝廉拜遷除浚長卒于家初慎以五經傳說臧否不同於是撰為五經異義又作說文解字十四篇皆傳於

世

蔡玄字叔陵汝南南頓人也學通五經門徒常千人其著錄者萬六千人徵辟並不就順帝特徵拜議郎講論五經異同甚合帝意遷侍中出爲弘農太守卒於官

魏

按魏略以董遇賈洪邯鄲淳薛夏隗禧蘇林樂詳等七人爲儒宗傳今以邯鄲淳事已在王粲傳蘇林事在劉劭傳特叙五人焉

董遇字季直弘農人也性質訥而好學興平中關中擾

亂與兄季中依將軍段熲遇采摺負販而常挾持經書投閑習讀其兄笑之而遇不改及建安初王綱小設郡舉孝廉稍遷黃門侍郎是時漢帝委政太祖遇旦夕侍講爲天子所愛信至二十二年許中百官矯制遇雖不與謀猶被錄詣鄴轉爲冗散常從太祖西征過弘農王冢太祖疑欲謁顧問左右左右莫對遇進曰春秋之義國君即位未逾年而卒不成爲君弘農王即阼旣淺又爲暴臣所制降在藩國不應謁太祖乃過黃初中出爲郡守明帝時入爲侍中大司農數年病亡初遇善治老

子爲老子作訓註又善左氏傳更爲作朱墨別異人有從
學者遇不肯教之而云必當先讀百遍言讀書百遍而
義自見從學者云苦渴無日遇言當以三餘或問三餘
之意荅曰冬者歲之餘夜者日之餘陰雨者時之餘由
是諸生少從遇學無傳其朱墨者遇子綏亦有才學位
至祕書監

賈洪字叔業京兆新豐人也好學有才而特精於春秋
左傳建安初仕郡舉計掾應州辟時州中自參軍事以下
百餘人唯洪與馮翊嚴苞交通材學最高洪歷守三縣

令所在輒開除黌舍親授諸生後馬超反超劫洪將詣
華陰使作露布洪不獲已爲作之司隸鐘繇在東識其
文曰此賈洪作也及超破走太祖召洪署軍謀掾猶以
其前爲超作露布文故不即叙晚乃出爲陰泉長延康
中轉爲白馬王相洪善能談戲王彪亦雅好文學常師
宗之過於三卿數歲病亡亡時年五十餘時人爲之恨
仕不至二千石而嚴苞亦歷守二縣黃初中以高才入爲
祕書丞數奏文賦文帝異之出爲西平太守卒於官

薛夏字宣聲天水人也博學有才天水舊有姜闇任趙

四姓常推於郡中而夏爲單家不爲降屈四姓欲共治之夏乃游逸東詣京都太祖宿聞其名甚禮遇之後四姓又使囚遙引夏關移潁川收捕繫獄時太祖已在冀州聞夏爲本郡所質撫掌曰夏無罪也漢陽兒輩直欲殺之耳乃告潁川使理出之召署軍謀掾文帝又嘉其才黃初中爲秘書丞帝每與夏推論書傳未嘗不終日也每呼之不名而謂之薛君夏居甚貧帝又顧其衣薄解所御服袍賜之其後征東將軍曹休來朝時帝方與夏有所咨論而外啓休到帝引入坐定帝顧夏言之於

休曰此君秘書丞天水薛宣聲也宜共談其見遇如此尋欲用之會文帝崩至太和中嘗以公事移蘭臺蘭臺自以臺也而秘書署耳謂夏爲不得儀推吏當有坐者夏報之曰蘭臺爲外臺秘書爲內閣臺閣一也何不相移之有蘭臺屈無以折自是之後遂以爲常後數歲病亡勅其子無還天水

隗禧字子牙京兆人也世單家少好學初平中三輔亂禧南客荊州不以荒擾檐負經書每以採梠餘日則誦習之太祖定荊州召署軍謀掾黃初中爲譙王郎中王

宿聞其儒者常虛心從學禧亦敬恭以授王由是大得
賜遺以病還拜郎中年八十餘以老歿家就之學者甚
多禧既明經又善星官常仰瞻天文歎息謂魚豢曰天
下兵戈尚猶未息如之何豢又常從問左氏傳禧荅曰
欲知幽微莫若易人倫之紀莫若禮多識山川草木之
名莫若詩左氏直相斫書耳不足精意也豢因從問詩
禧說齊韓魯毛四家義不復執文有如諷誦又撰作諸
經解數十萬言未及繕寫而得聾疾後數歲病亡
樂詳字文載河東人也少好學建安初詳聞公車司馬

令南郡謝該善左氏傳乃從南陽步詣該問疑難諸要今
左氏樂氏問七十二事詳所撰也所問既畢遂歸鄉里時
杜畿爲太守亦甚好學畧詳文學祭酒使教後進於是
河東學業大興至黃初中徵拜博士于時太學初立有
博士十餘人學多褊狹又不熟悉略不親教備員而已
唯詳五業並受其或難教質而不解詳無愠色以杖畫
地牽譬引類至忘寢食以是獨擅名於遠近詳學既精
悉又善推步別受詔與太史典定律歷太和中轉拜騎
都尉以才劣於學故歷三世竟不出爲守宰正始中以

年老罷歸門徒數千人

儒林傳卷第一

通志一百七十二

